

YELKEP

Булгъанакъ мектебининъ газетасы

№ 6-7

Февраль-март 2025с.

«Тиль—халкънынъ байлыгъы» ярышы

Февраль айында Акъмесджит шеэрининъ 42 саны мектебинде «Тиль – халкънынъ байлыгъы» ярышынъ Джумхурий этапы олып кечти. Ярышнынъ максады – Къырым Джумхуриетинде яшагъан халкъларнынъ тилини сакълав, огренюв, менимсевдир.

Бизим мектебимизден эр сене истидатлы талебелеримиз бу ярышта фааль иштирак этелер ве юксек ерлер къазаналар. Бу сене де балаларымыз чешит номинацияларда иштирак эттилер: «Сёз устазы» («Мастер слова»), «Эдебий эсерлерни ифадели окъув», («Декламация литературных произведений») ве «Иджадий ишлер ярышы» («Письменная творческая работа»).


«Иджадий ишлер ярышы» номинациясында: Аджиева Эдие, къырымтатар тили - 1 ер (ребер Гафарова М.Ш.); Абдумаликов Абдуалим, немсе тили - 1 ер (ребер Асанова У.С.); Матичев Решат, украин тили - 3 ер (ребер Усеинова Л.Н.)

«Эдебий эсерлерни ифадели окъув» номинациясында: Аккиева Нилюфер, къырымтатар тили, 3-А сыныф - 2 ер (ребер Гафарова М.Ш.). Ибрагимова Мавиле, рус тили, 5-А сыныф – иштиракчи (ребер Ваапова Г.С.). Матичев Решат, украин тили, 6-Б сыныф – иштиракчи (ребер Усеинова Л.Н.). Аджиева Эдие, немсе тили, 7-Б сыныф – иштиракчи (ребер Асанова У.С.). «Сёз устазы» номинациясында: Кубединова Камилла, къырымтатар тили, 11 сыныф - иштиракчи (ребер Сейдаметова Э.Р.).

Балаларымызны ве оджаларымызны хайырлаймыз!

Машалла!

(Идрисова Сание, 7 сыныф)



Номан Челебиджиханнынъ хатыра куню

Истидатлы шаир, язджы, биринджи Миллий Къурултайнынъ ёлбашчысы, халкъымызнынъ улу огълу ве къараманы, джемаат эрбабы, муфтий ве сиясетчи олгъан Номан Челебиджиханнынъ хатыра кунюне багъышлап, мектебимизде тедбирлер олып кечти. Балалар онынъ терджимейялы, иджадий ёлу, халкъымыз ичюн япкъан къараманлыкълары ве онынъ дешетли олюми акъкъында икяе эттилер. Онынъ шиирлерини эзберден окъудылар, «Ант эткенмен» гимнини йырладылар. Къырымтатар халкъынынъ улу огълу Номан Челебиджихан бизим юреклеримизде даима яшайджакъ!



(Бенгли Нияр, 8 сыныф)




Къырым Федераль университетинде (КФУ) тувгъан тиллер ве эдебиятлар боюнджа олимпиаданынъ екюневий къысмы олып кечти. Тедбирде бутюн Къырымдан 163 талебе, 8-11 сыныфлар иштирак эттилер. Бу олимпиада Къырымда энди учюнджи кере олып кече. Олимпиаданынъ гъалиплери имтиязлар (льготы) алдылар, яни къошма баллар къазандылар. Бу баллар окъув юрткъа киреджекте, ярдым этеджеклер.



Машаалла бизим балаларымызгъа! (Усеинова Сафие, 7 сыныф)

Машаалла бизим балаларымызгъа! (Усеинова Сафие, 7 сыныф)



ХАЛКЪАРА ТУВГЪАН ТИЛИ КУНЮ

Эр сене бизим мектебимизде Халкъара тувгъан тили кунюне багъышлап, Къырымтатар тили афтасы кечириле. Афта девамьнда чешит тедбирлер кечириле.

Бу сене де къырымтатар тили оджалары ярдымынен бутюн афта чешит меракълы ярышлар кечирилди: «Меним Ватаным - Къырым» мевзу боюнджа ресимлер ярышы, 1-4 сыныфлар арасында шиирлерни ифадели окъув ярышы, "Тиль - халкънынъ джаныдыр" мевзу боюнджа иншалар ярышы, 6-А ве 6-Б сыныф талебелеринен «Тувгъан эдебият биыгирлерни» адлы ярыш.

2 сыныф талебелери жюри азаларына ве сейирджилерге ана тилиндедюльбер йырны иджра эттилер. Гъалиплер ярлыкъларнен такъдирлендилер.

Тедбирлер меракълы кечти.

(Бенгли Нияр, 8 сыныф)



МЕДИА-МАСТЕРСКАЯ



28 март куню Акъмесджит шеэринде «Медиа-Мастерская» серлевалы тедбир олып кечти. Тедбирде Къырымнынъ чешит районларындан ве шеэрлеринден кельген, тахминен 60 талебе иштирак этти. Мектебимизнинъ талебелери, «Яш журналистлер» тегерегине къатнагъан балалар, Бенгли Нияр, Эмиралиева Селиме ве Ибрагимов Шакир бизим мектебимизни такъдим эттилер. Тедбирде истидатлы оджалар чыкышта булунуп, амелиятта меракълы дерслер кечирдилер. Балалар нейросеть ярдымынен видео, репортаж съёмкаларыны, интервью япмакълары, фотосуретлерни догъру чыкъармакълары огрендилер.

Файдалы тедбирден балалар мемнюн къалдылар.

(Мердышева Мелек, 7 сыныф)